

Wulf Wagers wunderliche Weltbetrachtung

Ikea – Entdecke die Unmöglichkeiten

Werbung ond Wirklichkeit liegt leider oft weit usanander. Des han i neulich bei ma guad geplanta Ei'kauf bei IKEA mol wieder gmerkt. Mir hend em Katalog an Schrank ausgsucht und im Internet sorgfältig den Korpus von dem schwedisch-chinesischa Schranksyschem mit difizilem Innaläba gfüllt. Noch vier Stond aussucha ond eigäba, hemmr no enttäuscht feschtschtella missa, dass mr alles, außer de Schranktüra em Internet bschdella ka. Ha, so an Granatascheiß. Also semmr mit alle Angaba noch Ulm gfahra ond hend des Teil bschdella, liefra on da Aufbau von skandinavischa Spezialischda macha lassa wella.

No semmr bei so ama Servicestand rond a Stond agstanda, weil dort a Frau praktisch ihr komplette Wohnungseirichtung bschdellt hot. Die hat sich oheimlich aufregt, weil se stän-



dig von ebber om Rot gfrogt worda ischt. Guad, mr zieht halt au koi gelbs Poloshirt a, wemmr zom IKEA eikaufa goht.

Noch ra Stond send mir no endlich drakomma. No hot mr alle 78 Teile en da Combjudr eigäbe, om ons nochher zom vrzehla, dass mir die Schrankkorpusteile direkt aus dem Regal hola misstat, zahle, ond no zur Spedition rechts neba dr Kasse bringa misstat. Mr hend ons no alle Regalnummra genau aufschriebe ond wo mr onser

Lieferadress ageba hend, hot die Beraterin gesagt, dass mir in Ulm gar net bschdella kenntat, weil des IKEA-Haus en Sindelfinga näher bei onserm Wohnort sei. Allerdings müsstat mir dort die ganze Beschdellong noamol aufgäba, weil die Syschteme von ihre Combjudr net mitnander schaffa dädat. Woiß dr Elch wieso! Nachdem mir jetzt scho vier Stond en Ulm ond vier Stond bei der vorgegangana Interneteigabe verplämpert hend, hemmr ons entschlossa, getreu dem IKEA-Werbepusch: „Wohnst Du noch oder lebst Du schon?“ drzua entschieda ab sofort lieber en de alde Möbel zom wohna, als en ma skandinavischa Service-Scheiß zom läba!

Bis näggschd Woch'
Ihr
Wulf Wager

Alle Kolumnen zum Nachlesen unter: www.woascht.de